

臺灣閩南語

現代詩社會組第一名



## 坐清 tī 一首漲流 ê 詩 lìn

Ti 子宮 buē 赴孵出來 ê 詩 ínn

Tuì 靈魂驚醒

夢 伸手

向過路 ê 日頭光討食

筆尾 iau 飢 tiām 靜 tiô 跳

空空 ê 胃 ik 出 tsia-iānn ê 心事

Tshúg 幾句仔慘 tsheh ê 散句

Bih tuà 無縫 ê 磅空

秋光猶原射 thàng sán-pi-pa ê 詩 tsuā

He 是詩上 siak-phah ê 面 khing

文字吊鼎

親像一堵壁 tshāi tī 電腦螢幕

Sa 無 tsáng ê 對話 hōo 秋風微微仔吹起

數想 khok-pih 初寫 ê 光絲

鈍去 ê 筆心, thūn 滿暗 sàm

詩心 ng-ng iap-iap 閃閃 sih-sih

畫 bē 出曠闊 ê 目線

Tiû-tû 吊 tī 情緒 ê 尾溜

Iā 落 tàu-bē-bā ê 文字  
一粒一粒火星 uì 中年 ê 字勻 liàng 出  
若清若霧 ê 魚尾紋  
Tàuh-tàuh-á puh-ínn、輪迴  
感覺歲數 tshiâu 一款角度 kap 我對 tshiàng

Kiu 水 ê 虹漸漸 tsiânn-tsò  
Hu 去 ê 詩頁  
隱遁 ê 弦仔聲  
雄雄 uì 肚臍 khang 激出  
堅凍做冰  
摸暗 hānn 入去 ta-pôo ê 心肝窟  
Ti 記 tî 一絲一絲 ê 雨 飄落  
若聽著老去 ê 碑文 tshit 做少年  
親像青春無 áu 痕、無驚惶  
詩脈 khuann-khuann-á thián 開  
爬 suá、走標  
我幼幼仔聽教堂 ê 鐘聲敲開冰角

點一 pha bâ-bū-kng，烘燒寂寞  
等待深 lóh ê 意象溢入窗仔門縫  
Thuànn 過指頭仔尖 kap 夢  
Kā 詩線 tióh-ân  
散形 ê 目神 tióh 會透心刻骨  
Tioh 會 kā 墮落 ê 靈魂 hôo 起來

Siánn leh 偷 gîm 秋天 ê lak-tē-á ?

Siánn leh 偷看過期 ê 少年日記 ?

Buē 成形 ê 詩若 ian-iā

有鹹鹹 àu-àu ê 味

詩人啊！

你 kám 有一粒 bē 生 sian ê 名號 ?

He 一 tîng 一 tîng 漆滿陰 thim ê 意念啊！

Bē-tàng 據在伊 khiā tiàm 目頭 ê kap-tsuā

Tshàng-tshiu、生 kiánn

Uì 頭 tîng khoó-uá 一條孤 khút ê

沉 bih ê 內才，想像

家已關 tī 坐清內底 ê

文字 kap 力頭

Tī 一首漲流 ê 詩 lìn

## 作者感言

出獄兩冬外 beh uá 三冬，論真講，創作量無 tse (編務 kap 經濟壓力)，邀稿 kap 文學獎 lóng 是「逼」我出手 ê 理由，tse 對一個創作者來講，實在真害！

這欸情形，會 hōo 我 liáh 準家已已經失去創作 ê 動力，甚至內才！〈坐清 tī 一首漲流 ê 詩 lìn〉就是描寫詩人 án-tsuánn uì ta 去 ê 墨水，走 tshuē 以早寫詩 ê 企圖心 kap 動力。Huān-sè「坐清」(沉澱)是重新檢驗內心詩 ínn 成長 ê 點點滴滴上好 ê 步數。

兩冬前得頭賞(停辦一冬)，兩冬後 koh 得頭賞，感謝主，祂猶原無放棄我。感謝前輩阿仁老師 ê 鼓勵；文友定邦兄、正雄兄、俊州兄 in giah 筆仔 tī 我後壁拚勢 kā 我 tiap；猶有 tiām-tiām 無怨言一路陪我全行全命 è M，若無伊，恐驚我早就散糊糊 ah！



## 柯柏榮

臺灣歌仔冊學會秘書長、臺南市管芒花台語文學會總幹事、  
臺灣南都文創文教協會秘書長